

欽定剿平粵匪方略

欽定勦平粵匪方略卷二百五 戊午年

九月十六日 戊子 王懿德奏言

臣前因患病蒙

恩賞假調理現精力稍可支持曷敢藉病偷安署督

臣慶端自克復松溪等縣復聞收復崇安城池邵

武郡城尙未收復現經臣飭令副將繼興管帶

省標兵丁三百名另雇壯勇三百名合組成兵勇六百名配足軍火器械定於八月二十日臣親

統赴延接辦軍務總期激勵士卒迅掃機槍奏
入

上命軍機大臣傳諭王懿德慶端曰前因王懿德患病
給假調理茲以病體稍痊卽起程赴延平督辦軍務
具見急公憫忱覽奏欣慰崇安克復以後邵武賊勢
窮蹙卽著該督檄勦弁兵速籌攻克至省城亦關緊
要王懿德行抵延平接印後慶端著卽回省周天培

一軍因江北儀揚失陷六合被圍疊經和春等奏請
調回援應業經諭令速行調往並著王懿德飭令該
總兵統率所部迅速起程馳往江蘇聽候和春張國
樑調撥

同日慶端奏言逆匪竄陷崇安縣城負固不退
適有延建邵道趙印川委員新募河南光州勇
五百名已至河口取道由桐木關進來轉至大

安值星村縣丞錢燕昌招集聯丁六百餘名在
分水關駐紮千總許得捷帶坑口聯丁數百名
將近大安適典史胡瑩等各帶聯丁先後齊到
於七月二十九日行至四渡橋地方該逆約二
百餘名在彼擄搶遊擊王興棠帶領聯丁四面
圍擊殲除無遺隨令各軍乘勝趕追擁至城下
我軍隨帶木梯登城各軍奮勇喊進該逆卽紛

紛逃竄我軍斬馘甚多餘黨盡逃當將城池收復計福建全省現僅邵武府城尙爲賊踞該逆勢已窮蹙亟應乘勝進兵臣飭周天受統師疾趨建陽會同已革知府匡開益等由莒口麻沙一路進兵周天培等由延平上勦洋口敗匪卽由順昌大幹一路進兵分攻邵武務令迅復郡城以靖全省奏入報

十七日

己丑

德興阿奏言吉林甯古塔副都統富

春近探知其養傷在邵臣駐邵後該副都統來
見察看所受之傷亦不甚重富春以帶隊大員
徑自離營久稽時日理合從嚴懲辦惟念該員
因受傷遠適且年已衰邁可否顧懇

天恩將副都統富春以原品休致回旗其所帶馬隊卽

交富明阿管帶奏入

上諭內閣曰吉林甯古塔副都統富春當浦日失守時受傷並不甚重輒自離營赴邵伯養傷實屬懦怯無能僅予休致不足蔽辜姑念該員前在軍營尙有勞績現在年已衰邁著卽革職從寬免其治罪

德興阿又奏言本月初九日張國樑行抵萬福橋各兵陸續過江臣當派成明與富明阿會商

分帶各營馬步兵勇隨同進剿並於萬福橋搭
造浮橋便於進隊揚州之賊屢由西北角竄擾
晝則旗幟絡繹夜則燈火往來自六蟠灣頭萬
福橋霍家橋等處屢次獲勝該逆漸消窺伺之
念矣南軍部署稍定會合攻勦揚城當易得手
臣派留安勇等扼守邵伯毛三元等扼守六蟠
其餘步隊悉令成明管帶至各起馬隊暨吉林

新來馬隊詹啟綸所帶之勇並飭富明阿管帶
合勦時由富明阿調度前進鞠殿華創痕未愈
仍在萬福橋霍家橋兩處堵扼使賊知我有備
不敢四犯而裏下河既可力保高寶清淮亦可
無虞防勦兩端均有裨益奏入報

十八日庚寅勝保翁同書奏言德興阿自浦口失

事後竊冀其趕緊設法收集潰軍尙可力圖補救不期一敗塗地至於此極始則臥居礮船繼而退往泗溝舟次置陸路於不顧潰敗兵勇因軍無統率或奔天長或趨六合茫茫無所復之不數日而大股賊衆果由儀徵一路跟蹤而至揚州嗣又聞其移紮東岸之萬福橋查揚城尙在西岸中隔大河一道該處距賊巢甚遠不知

如何堵截攻勦昨接其告急文移又稱自邵伯
大營發遞種種俱堪詫異頃於盱眙接見地方
官員又知邵伯鎮被匪焚燒該大臣退守高郵
似此節節退避愈離愈遠勢不至引賊北驅不
止漕河兩臣設防兵勇爲數想亦無多是否足
資堵遏殊無把握應如何

嚴飭德興阿實力前進以免再有疏虞抑或另行

簡派重臣以扼北犯之處伏候

聖裁奏入

上命軍機大臣傳諭勝保翁同書曰此次德興阿堵勦不力以致兵勇潰散儀揚等處相繼失守一敗塗地實所不料因念德興阿患病鞠殿華受傷故僅予薄懲責令其收集潰兵迅圖克復復派總兵毛三元成明幫辦軍務張國樑親督重兵渡江赴援已抵萬福

橋勝保因儀揚失守馳抵盱眙力籌扼勦實屬不分
畛域此時東路有張國樑等勦辦一經得手該逆勢
必回竄自應扼要堵勦未便深入致西北空虛盱眙
密邇天長該大臣業經派兵攻擊若能迅拔天長則
亦可孤六合儀揚之賊勢惟鳳臨捻匪尙未勦除廬
州亦未收復賊蹤紛竄在在堪虞如翁同書一軍堪
資禦侮則勝保自應仍駐盱眙以壯聲威而籌攻勦

設或定遠等處情形緊急該大臣仍當折回策應未可偏重東路致有疏虞

勝保翁同書又奏言粵匪竄陷天長雖經官軍擊敗而猖獗殊甚後路五河縣城復被捻逆繞越撲擾旋卽退竄回臨是盱眙兩面受敵東路情形萬緊又據報稱天長匪衆竄至縣北五十里之同城鎮該鎮緊接盱境且西北卽係蔣壩

要地距清江祇百二十里上犯之路最捷臣等
先其所急力扼同鎮以顧北竄當卽抽調副將
張得勝暫駐池河臣翁同書仍紮定遠策應各
路並於殷家澗明光一帶添兵堵勦臣勝保赴
定營會商一切布置後卽將池河隨營各隊調
令由明光澗溪一路親督東行連接各路探報
知六合尙在危急揚州儀徵相繼復失又接據

河臣庚長來咨清淮俱已震動該處原設防軍甚單不得已將前此派防洪湖要隘之浮山口兵勇全行撤調回浦堵禦北路門戶囑由臣等另行撥兵防守浮山查浮山係由皖至淮入湖隘口關繫亦重現派守備許保清星馳前往隨同候補道張清元所帶礮船水勇實力防堵接奉

諭旨以六合被圍令臣等轉飭提督德安由皖馳往救援該提督前由江南赴皖時本未帶有官軍臣等一面遵

旨飛飭赴援並由臣翁同書就皖軍內酌撥令其帶同前往祇恐爲數無多難稱得力且該提督必須由定遠繞道清江東岸方能與德興阿會合深恐緩不濟急天長與揚城犄角今該逆又分踞

同鎮情殊詭譎若復長驅而北直達清江一無

險隘可扼是此時北竄情形萬分緊急臣勝保

倍道疾馳行抵盱眙惟當審度賊情或先規同

鎮或徑擣天長總以力扼北犯爲主至池河與

定遠輔車相依臣若久離池營則臣翁同書一

軍遇有緩急勢成孤立擬察度東路攻勦事機

儒能得手可以扼住北竄兇鋒臣勝保仍回池

聞

河居中調度以顧全局奏入報

同日

上命軍機大臣傳諭德興阿鞠殿華成明毛三元曰現
在張國樑已統帶重兵渡江援勦該大臣等務當嚴
飭將弁會合南軍圖復揚州以贖前愆前派總兵毛
三元成明幫辦軍務該總兵等卽與鞠殿華幫同德

興阿申明紀律重整軍威以遏賊匪北竄

二十日壬辰協辦大學士湖廣總督官文江甯將

軍都興阿浙江布政使李續賓奏言桐城城高而堅係皖省東北路之樞最爲要害自咸豐三年十月間該逆盤踞城中淪陷至今其城之北門跨山該逆於山上修大甃壘二座東北一帶修大甃壘三座小壘四座又於西南一帶修壘

四座恃爲負嵎久計臣李續賓派副將趙克彰等拔營先進親率副將何紹彩等繼之趙克彰等至城外五里墩地方正在紮營該逆分五路來撲趙克彰等列陣於中路上以當其衝黃勝日等排列於右丁銳義等隱伏於左該逆逼近趙克彰等齊出橫衝刺斃悍賊多名賊皆狂奔保慶等各率馬步急追遂乘勢攻破西南四

壘計斃賊一千六七百名次日賊復由西門出
撲趙克彰等整隊鏖戰其東北面城中壘中之
賊潛出大股自山後繞抄我營後路適臣李續
賓率後隊各營甫至突前迎擊出賊不意各營
奮力前衝賊滿山奔竄殺斃約二千餘名其前
面撲營之賊亦驚潰繞奔東北門入城固守臣
李續賓卽率營追至近城當飭各營逼城之西

南北三面駐營連日加修營壘派副將何紹彩等攻西南城門親率李續燾等馬步由西門繞南門而東先攻東面兩大壘各營一鼓猛撲銳氣百倍越濠緣登其賊壘祇有一門及各勇攻入無路奔竄圍而殲之遂分攻四小壘羣賊見兩壘悍賊盡被屠戮蒼黃驚亂棄壘而逃趙克彰等各率勇擗截殺之其第三大壘切近城垣

各營分兵近逼城門賊不敢出各弁勇奮力撲
壘破其壘門盡殺壘中之賊轉攻北門山上大
壘仰攻逾時火彈拋入二壘相繼火發羣賊被
焚被殺無得脫者自卯至申共破賊壘九座殺
賊約六七千名諸壘既破乘夜飭趙克彰等伏
東門外之高更樓木魚山一帶朱希廣等攻北
門李續燾等攻南門周寬世等攻西門列炬環

城火光如晝三更時各勇乘隙緣登賊拏命開
東作向陽二門分路衝出趙克彰等伏兵齊起
前後夾擊追殺四五十里屍積道旁奪獲羸馬
五百餘匹大礮百餘尊旗幟軍械火藥鉛彈五
千餘件臣李續賓進城招集士民桐城縣城業
經克復所有在事最爲出力之副將趙克彰等
謹先行開列懇請分別獎敘其餘出力文武員

奏可否由臣等覈實奏獎出自

天恩至陣亡之把總賀宏勝擬請從優照守備例議卹
外委彭福清夏鵬程擬請從優照把總例議卹

奏八

上諭內閣曰李續賓督軍進攻桐城派令副將趙克彰
等各營先後繼進攻破城外賊壘乘夜進攻各門各
勇攀登前後夾擊縣城收復安徽桐城縣地方險要

被賊盤踞數年此次進攻克復迅速著官文飭令李
續賓等督率各軍以次進克舒城等處掃蕩逆氛所
有最爲出力之副將趙克彰著免補副將交軍機處
記名遇有總兵缺出請旨簡放副將楊得武著賞加
總兵銜朱希廣著賞給勁勇巴圖魯名號都司饒萬
福著免補都司以遊擊儘先補用並賞換花翎參將
劉神山著免補參將以副將儘先補用其餘出力文

武員弁著官文等查明保奏陣亡把總賀宏勝著從優照守備例外委彭福清夏鵬程著從優照把總例議卹

二十一日癸巳胡興仁奏言探聞閩境已無大股

粵賊惟九龍山土匪時出滋擾皖南一帶惟東流建德爲賊蹤出沒之所饒州若有重兵彈壓則皖南可資策應現在江西全境肅清應請

飭下撫臣耆齡選派得力將弁統帶重兵駐紮饒郡於

三省邊防均有裨益奏入

上命軍機大臣傳諭耆齡曰饒州爲皖南浙江福建等省邊防重地若以重兵扼紮饒州則皖南可資策應而於三省邊防均有裨益現在江西全境均已肅清惟景德鎮尚有賊蹤正宜移撥官兵擇要扼紮杜三省之竄越卽以固江西之藩籬著耆齡酌量選派得

力將弁統帶重兵前赴饒州駐紮以資防守

胡興仁又奏言臣接准張芾咨稱總兵周天受
統帶兵勇二千八百人於八月二十八日由壽
昌起程九月初二日馳至徽郡與張芾函商卽
派都司陳大富等率勇馳赴太平以助江長貴
防勦都司周光順等率勇赴漁亭以助余永椿
防黟祁一帶遊擊熊廷芳等率勇赴清華街助

攻婺源周天受率親軍及參將李春寅等由上
溪司日前進督攻婺源迅圖克復此次婺祁石
埭三面同時告警幸將士用命江長貴調度迅
速不致內犯而祁門圍練竟能力遏狂氛太平
民團復能越境助剿以致祁石兩防早就肅清
惟婺賊尙未勦退適周天受率得勝之師前來
可期有濟等語臣查周天受已到徽防分投攻

勦皖南賊匪福建自浦城克復後饒廷選等統
兵與林向榮等合師攻勦又有曾國藩整旅入
閩建郡賊匪不難指日殄除總兵李定太自駐
紮常山以來嚴戢兵勇招徠商賈刻下民氣敉
安又分兵援勦江西皖南復添勇兼顧浦城防
賊回竄一時難以遠離臣咨會相機而動勿稍

疏解奏入報

二十二日

甲午

總兵阿奏言逆匪竄踞揚城屢欲

圖犯邵伯自張國樑由南岸帶兵渡江臣飛飭

搭造萬福橋浮橋張國樑親督工役於本月十

四日搭成拔營前進臣撥兵五千名協同進剿

是夜張國樑密派官兵出隊進攻揚城東西兩

門一面知會鞠殿華等進攻廣儲便益兩門並

飭地方文武隨同攻剿逆匪由南門擁出五千人由便益廣儲兩門各擁出三四千人由東門擁出六七千人我軍勇氣百倍殺賊無數逆匪抵敵不住旋行敗退馮觀勝等帶兵追殺直至南門黃靖等帶勇殺至東門成明等殺至廣儲便益兩門突有騎馬悍賊由北門擁出七八千人張國樑揮令張永清等飛馬迎擊並飭令

楊福增等督兵施放火礮連環繼進騎馬賊
紛紛倒地賊隊驚亂張國樑揮令官軍一齊搶
進鞠殿華等相繼追擊逆賊自相踐踏兵勇愈
戰愈勵擊斃賊匪以萬計遂於十五日將揚州
府城克復餘匪向西路竄走兵勇跟蹤追剿李
若珠等八城會同地方文武安撫難民臣猶恐
敗匪反竄當飭毛三元督令管駕水礮臺各員

緊扼六關復派副將魁霖等帶兵由邵伯過河
至黃珏橋一帶搜捕餘匪適逃竄之賊藏匿各
莊又殺斃數百人餘仍向西北奔去現在張國
樸統率諸軍由儀徵進兵冀解六合之圍臣囑
毛三元率領成明等督兵五千名隨同前進鞠
殿華帶兵二千名駐守揚州城內並派穆克登
額帶馬步一千名扼守萬福橋仍一面看守浮

橋刻下天長大股麤聚恐各兵移營前進該逆
復窺揚州該處駐兵甚單尙爲可慮且天長與
高郵僅一湖之隔儻由湖徑渡則邵伯仍屬契
緊臣是以尙駐邵伯派魁霖等帶兵二千名扼
守其露筋祠一處緊接邵伯飭令馬國陞照舊
駐防所撥水礮臺二座仍於該處堵扼臣一面
飭揚城文武入城辦事一面飛飭各軍前進六

合豐城固守候補道溫紹原總兵羅玉斌等恐
力有不繼張國樑聲威久著加以各路援兵陸
續湊集諒易解圍臣惟有策勵將士勉圖補救
在事出力員弁兵勇可否容臣與張國樑會商
奏保出自

逾格鴻慈

同日楊能格奏言自本月初九日張國樑到後

卽在仙女鎮親督委員搭蓋浮橋竭五晝夜之力甫得完竣官兵分起過河十五日張國樑整隊分三路進兵奮勇向前分門攻打斃賊極多
張國樑揮兵一擁進城將府城克復賊由西門逃竄張國樑令兵勇追勦斬殺尤多臣督飭委員等搜捕餘匪現在人心大定堪以仰慰

聖懷均奏入

上命軍機大臣傳諭德興阿鞠殿華成明毛三元楊能
格曰此次揚城失陷經張國樑督兵北渡迅復城池
勦辦甚爲得手現在張國樑已由儀徵進援六合自
可力解城圍德興阿收集兵勇現有一萬餘名尤應
妥籌布置成明毛三元分帶兵勇隨同張國樑進剿
其揚州府城已有鞠殿華帶兵駐守惟天長賊匪時
圖窺伺高寶湖面巡防尤關緊要著德興阿酌撥兵

勇分赴高郵一帶協同堵勦不得專委之邵燦庚長
致滋貽誤三河以南賊匪據勝保奏稱業已被勦南
竄但沿湖旁竄處處可通若專守邵伯是但能顧揚
營後路而於北竄要衝仍難堵遏德興阿等卽當迅
籌調度毋誤事機至張國樑一軍現赴六合其餉需
軍火或有缺乏卽著楊能格妥籌接濟不得因係南
岸官軍稍存膜視

上諭內閣曰逆匪竄踞揚城經張國樑由南岸督帶大兵渡江於九月十五日將府城克復此次賊踞揚城旬餘卽行克復勦辦尙爲迅速所有在事出力人員著准其會同張國樑擇尤保奏

德興阿又奏言據高郵州知州于醇儒稟稱本月初六日有賊船七隻自西向東馳駛當卽分起迎擊民勇悉在東岸堵截各船追至湖心開

槍擊沈匪船一隻又據寶應縣知縣陳兆齡稟
稱十二日蔣壩之三河以南有賊匪數千與我
兵隔河轟擊至今未退請撥兵援勦刻下分兵
前進圖解六合之圍邵伯存兵不多難以撥赴
高寶協堵惟有飛咨邵燦庚長請其就近設法
扼守使賊不至過湖乃能遏其北竄奏八

上命軍機大臣傳諭邵燦庚長曰揚州府城業已克復

張國樑已赴援六合勝保亦進攻天長自應以清淮
一路爲最要著邵燦等督飭在事員弁實力堵勦務
使賊蹤不能過湖北路方有把握如不敷調度卽飛
咨德興阿將諭撥之兵迅速派撥以厚兵力傅振邦
是否已抵清江前調山東官兵據崇恩奏已派兵四
百名派勇六百名兼程前進儻該總兵帶兵到浦可
令其暫留助剿俟逆氛漸遠再行折回徐州

德興阿又奏言此時下游江防喫緊前和春咨
調各船於本月初七日全幫均抵瓜鎮江面當
飭管帶各將弁擇要分撥堵禦庶使聲勢聯絡
不至賊船游駛總兵毛三元於臣駐守五臺山
時督帶水礮臺兵勇扼守萬福橋六舡等處刻
當進兵儀六毛三元卽統領馬步兵勇五千名
隨同張國樑進剿總以力解六合之圍爲要著

其調回援浙之周天培一軍此時揚州雖復天長尙爲賊踞該官兵過江時仍當遵

旨辦理奏入報

聞

同日勝保翁同書奏言天長賊勢日益比趨臣勝保馳抵盱眙方布置調派間忽報稱同鎮之賊全行退走臣趕緊飭令營總莫爾慶額等分

帶馬步進剿該逆大股約近兩萬人連夜由天
長北竄於本月十二日已抵三河集一帶地方
幸河臣庚長派防蔣壩之道員赫特赫訥所帶
練勇堵禦嚴密未能卽竄過河該逆連夜搭造
浮橋意欲由下游之觀音寺偷渡以抄後路蔣
壩情形萬分危急臣雖先期派撥各隊前往截
擊仍恐兵力不敷復添派遊擊德元督帶甘兵

連夜拔營會合莫爾慶額等軍一同進紮並派副都統麟瑞等星夜赴援該副都統等帶兵疾馳而進遇賊於盱眙東四十里之高橋突向賊隊衝入匪衆紛紛敗竄十三日大股逆衆虜聚蔣壩對岸十里之三河集撲擾蔣壩防兵竭力擊該逆抵死不退而附近數十里內各村莊羣匪分屯散踞肆行焚掠幾於徧地賊蹤官軍

乘其浮橋尙未搭就分由西南面之馬壩西面
之高橋兩路衝突該逆始猶分股抗拒我軍一
齊衝擊匪勢不支殲斃轟斃之賊不計其數遂
將各村莊一掃而清餘匪悉竄併三河集一帶
匪黨受創賊膽頗寒臣於是夜自率親軍馳往
督勦行近三河集天方黎明各軍隨同前進該
逆一見大隊掩至遂不戰而潰全股向南狂奔

馬隊乘勢跟蹤痛勦沿途趕殺三十餘里斃匪五百餘名其三河集未及竄逃餘賊均被我兵搜殺淨盡當飭各隊向馬壩一路追擊一面就近派令在籍江蘇候補道吳棠會同該地方法官邀集天吁團練聯絡聲勢協助官軍臣仍卽折回盱眙居中調度以資控制此股粵逆潛圖假道北犯經臣督軍痛加勦洗轉危爲安在事出

力員弁兵勇容查明奏懇

恩施其蔣塉防堵出力人員應由河臣酌保請獎奏入
上命軍機大臣傳諭勝保曰天長竄匪直撲三河集意
圖北犯經勝保督飭弁兵擊退辦理極爲得手惟該
逆被勦南遁設由湖內竄撲高郵寶應則清淮仍形
喫重必應將天長縣城速爲克復庶賊衆無由東犯
即可杜其北竄現在張國樑親赴六合於儀徵等處

尙可兼顧至天長地近盱眙卽著勝保乘此聲威將該處賊匪痛加攻勦速復縣城無任逆賊久踞提督德安一軍業經起程並著飭令迅速前赴六合會同

張國樑速解城圍

上諭內閣曰逆賊竄踞天長意圖北竄分股直撲三河集經派防蔣壩道員赫特赫訥帶勇堵禦未能過河適副都統麟瑞等馳至於高橋遇賊接仗勝保復督

軍抵三河集該逆悉數南遁三河集地方肅清所有
在事出力員弁兵勇著勝保俟追勦竄匪淨盡彙請
獎勵其蔣壩防堵出力各員並著邵燦庚長查明保
奏

同日慶端奏言漳州鎮總兵周天受鶴麗鎮總
兵周天培統帶雄師援閩屢立戰功該二員久
歷戎行深明韜略前日晤周天培談論之下該

鎮直以地方引爲己任其忠勇尤爲可嘉閩省
地方多故久無將材能得周天受周天培在閩
坐鎮使之整頓營伍緝辦匪徒則濱海巖疆當
可永靖烽煙奏入

上命軍機大臣傳諭王懿德慶端曰總兵周天受周天
培帶兵援閩克復各城戰功懋著該撫請留該總兵
等在閩坐鎮自係爲保障地方起見惟周天受一軍

因皖南緊急經張芾調回防勦昨據胡興仁奏該總
兵現在籌攻婺源周天培一軍因江北軍務喫緊業
經飛調該總兵回至江蘇現在揚州雖已克復而浦
口天長儀徵尙淪於賊需兵甚急未便遲留現在閩
省邵郡克復全境肅清並有饒廷選等員堪資差遣
卽著王懿德等妥爲調度俟徽郡軍務稍鬆再令周
天受回漳州鎮本任可也

慶端又奏言邵武府城被逆久踞八月十六日
都司武明良帶勇由光澤赴邵同上坪聯丁攻
進西北兩門千總吳連升協同攻入東門斬馘
甚多卽日克復郡城查江右逆匪竄陷閩疆郡
縣節經次第克復茲邵武府城又據武明良等
攻克被陷各郡縣一律收復臣飛飭各文武搜
捕餘匪籌辦善後並飭總兵周天培等速將洋

日等處敗匪悉數殲餘其邵郡在事出力文武
兵勇聯董人等容另行擇尤保獎奏入

上諭內閣曰福建邵武府城被賊占踞經都司武明良
等協同聯丁將郡城克復此次逆匪竄擾閩疆屢陷
郡縣經慶端出省督勦現已次第收復一律肅清慶
端調度有方著交部議敘在事出力員弁人等准其
查明保奏

同日耆齡奏言福建殷匪竄至廣豐復竄玉山
勢極猖獗經候選道李元度廣饒九南道沈葆
楨等力保兩縣危城擊敗數萬狂寇實屬異常
出力江省各營及地方文武員弁可否准臣擇
尤請獎以昭激勸至景德鎮之賊現經臣飭令
劉于湧招集樂平浮梁團勇力杜內竄一俟援
剿之萬泰段起所部兵勇到日合力夾擊劉于

海
滄水師之挫實由饒郡陸勇孱弱遇賊奔潰以
致水師受困尙非該員督戰不力仰懇

恩施免其置議奏入

上諭內閣曰逆匪由閩回竄江西廣豐復竄玉山均經
官軍擊勦獲勝所有江西各營及地方文武員弁著
者齡擇尤請獎至竄入景德鎮之賊經甘肅安肅道
劉于滄督兵馳勦因陸勇潰敗以致水師不能得手

所有該員應得處分著免其置議仍著整頓各營迅
速勦辦毋使再有延蔓

耆齡又奏言逆匪回犯新城七月二十二日遊
擊劉光明督勇防守開槍斃賊數十人並親率
練勇潛出西門猝衝賊隊各門守城兵勇亦齊
出奮擊賊衆奔潰追殺四五百人二十三日卽
選道張運蘭率老湘等營自建昌馳至又飛調

王文瑞自南豐前進逆匪進退無路勢迫乞降
張運蘭等挑出精壯悍賊八百餘名概行正法
其餘裏脅老幼男女釋放回籍並經劉光明將
賊渠僞檢點胡其相等四名解省張運蘭旋赴
河口會師隨同曾國藩援閩臣飛調補用道劉
長佑率領楚勇扼紮新城並分撥參將鄧在富
等駐防瀘溪八月初六日福建賊匪竄至鐵牛

關鄧在富等率領各營堵勦賊匪萬餘來撲我軍分路力敵該逆分股由小路躡出我後焚燒營壘我軍腹背受敵遂致潰敗退回撫州賊旋闖入瀘溪縣城初九日賊竄金谿縣直撲入城卽經撫州府知府李瑞章等飭臨川崇仁兩縣團勇馳赴許灣一帶金谿縣知縣鄧國恩等亦招集鄉團進剿該逆望風奔逃分爲兩股一竄

安仁縣屬之鄧家埠一退回瀘溪是夜瀘溪一
股復竄入金邑城內次日鄧國恩等會同各縣
團勇進攻斃賊六十餘名餘匪竄入鄧家埠當
將金谿縣城收復瀘溪縣城亦經寶副中營羅
近秋馳往收復鄧家埠之賊屢犯東鄉縣邊界
均爲東邑團勇擊敗該逆於石港地方河水淺
處偷渡北岸經敵船擊斃無數逆衆屯北岸山

背旋陷東鄉縣城十六日賊擾黃金埠署餘干
縣知縣莫廷蕃督勇堵勦斃賊甚多賊遁回安
仁十九日曾國藩派張運蘭等馳往攻勦殺賊
七千餘人康國器等率水師並餘干東鄉兩縣
團勇合力兜剿擒斬多賊立復東鄉城池是夜
餘匪約二千人竄入萬年縣境經吳國佐追擊
並被萬年團勇截殺遂穿城而過二十二日竄

入樂平縣城經樂邑團勇攻勦殺賊三百餘人
敗匪退屯北門外復被道員劉于湧派軍進勦
賊匪悉遁景德又先於八月十四日福建邵武
府大股賊匪竄出黃土關前隊已至新城縣熊
村另股繞出中站劉長佑令遊擊翟國彥率勇
赴司前堵勦自率親兵繼之至長陂前力斬賊
目二人餘匪遁去十五日翟國彥等直抵熊村

逆衆萬餘猝起翟國彥等分三路衝擊賊乃退
去又追數里另股賊由山上來援崔大光率勇
截勦賊退過黃土關擁擠落後者悉爲我軍所
殲右路之賊亦經李明惠追逐出境是日約斃
賊千餘人生擒四十餘名逆匪二萬餘人復出
黃土關十九日劉長佑督勇進勦賊衆悉奔熊
村李明惠進攻董家坳督隊猛衝賊乃返奔時

劉長佑督同席寶田等從中路進拊賊之背該逆亦退向熊村李明惠等率勇分撲賊從市後奔逃適崔大光左路擊敗之賊亦追逐至此騎馬賊十餘人屢次回撲均爲各勇所殲餘匪逃往關下是日殺賊千餘人生擒五十四名二十一日劉長佑派勇擊礮下規源之賊各勇爭先奮進斬賊百數十人賊匪敗退高岡李士恩等

分路衝上另股賊由洞口抄出李篤勝等率勇
適至併力衝擊賊乃大潰各勇沿途追奔直至
中站左路翟國彥等至槐源有賊數百在該處
據掠見官兵至越嶺而遁殺賊約四五百人二
十四日賊衆復分三路來犯新城劉長佑派勇
分路迎擊自率親兵接應賊不能支亦即潰敗
我軍追至衝口敗匪自相踐踏李明惠等復追

殺數十人約共殺賊三四百名此次連日獲勝
足挫兇鋒但此等窮寇鋌而走險旁竄堪虞惟
有督飭各軍堵勦兼施務殲羣醜至新城安仁
勦匪出力各勇除老湘營應由曾國藩保奏外
其餘水陸兵勇可否容臣擇尤酌保以資鼓勵
其陣亡之千總陳吉昌應請

旨飭部照守備例議卽萬年樂平二縣如何被擾以及

瀘溪在城員弁下落查明另行辦理奏入

上諭內閣曰逆匪回竄江西新城等縣經張運蘭等兜勦旋卽撲滅其另股賊匪由瀘溪直竄安仁又經張運蘭及各屬團勇水師合力攻勦殲斃七八千名餘匪遠遁邵武大股復犯新城經道員劉長佑連日勦辦均獲大勝殺賊三四千名攻勦尙屬得手卽著張運蘭等乘勢將回竄賊匪勦洗淨盡此次新城安仁

勦匪出力各軍所有老湘營員弁兵勇著曾國藩查明保奏其餘水陸弁勇著耆齡擇尤酌保陣亡之千總陳吉昌著照守備例議卹萬年樂平二縣被擾情形及瀘溪縣在城員弁下落著一併查明具奏

欽定勦平粵匪方略卷二百六

戊午年

九月二十三日乙未官文都興阿楊載福李續賓

奏言自克復潛山桐城後臣都興阿由石牌率
師東勦安慶派翼長多隆阿總兵鮑超爲前敵
由清河三橋鎮進兵齊會大橋頭該處踞賊築
壘山旁及橋南一帶以拒官軍進勦之路乘我
兵初至趨擁出敵官軍各起馬隊踰橋涉水數

路衝擊賊遂潰退兵勇分途追殺斃賊過半前
去二十五里集賢關有賊踞關守險多隆阿帶
隊由總鋪繞攻關內賊壘鮑超率隊由團山徑
趨集賢關參將石清吉率飛虎三營暨各馬隊
兩路接應關內壘賊不料官兵繞山突至棄壘
驚逃我兵四路追殺賊壘賊卡盡行削平時鮑
超率霆營已至集賢關守關賊匪正在抵禦見

壘賊潰敗卽蒼黃失措我兵乘勢攻之遂破其
關潰賊緣山繞谷復被我兵追殺甚夥共計殺
賊千餘名我兵遂進集賢關分紮十里鋪一帶
九月初七日賊乘我營未竣由北門數路來撲
正值多隆阿帶馬隊前往警見賊來一面飛調
步隊接應一面分途衝擊射斃騎賊數名餘始
挫退次日臣都興阿商會福建提督臣楊載福

豫派礮船南列江面東由上新河入湖西由楊
柳洲入湖三面轟擊牽制城賊初九日多隆阿
鮑超率勇分攻城邊賊壘先派張萬祿等馬步
隊列陣西岡以防西門援賊派石清吉等馬步
隊列陣東岡以防東門援賊巴依爾呼蘭馬隊
中路策應其壘俱極高堅火器難施壘外濠深
兩丈密布椿籤濠外復有溪池護繞多隆阿鮑

超各督勁旅鳴溪越籬拔櫓入濠鑿級而上賊抵死抗拒我兵奮勇爭先各壘賊皆驚惶我勇各路齊登直突橫衝巷戰良久賊屍枕藉其竄踞屋中者經我兵揭椽掀瓦搜斬無遺北門城邊大壘四座同時平毀官兵勇氣倍增復乘勢攻破東西山灣小壘五座其城賊由東西兩門出援數次均經接應馬步隊擊退共計破壘九

座殺賊五千有餘奪獲大礮七十三尊大小擡
槍九百餘件生擒長髮賊五百二名臣都興阿
當飭多隆阿鮑超等卽於近城處修營開濠力
圖偏攻惟該逆憑踞堅城又多積聚其屬集城
中者率皆强悍兇逆而下游外來援賊復逼近
樅陽一帶官兵內攻堅城外勦強援臣等惟有
勉勵各軍水陸會合迅圖克復此次偏城一戰

卽平九壘皆由多隆阿鮑超督飭有方官兵十
分奮勇可否由臣等擇尤彙請獎敘出自

天恩奏入

上諭內閣曰官軍進剿安慶先將大橋頭一帶賊壘攻
破徑趨集賢關賊衆棄壘驚逃我軍四路追殺賊壘
賊卡盡行削平城邊賊壘復乘勢攻破殺賊五千餘
名生擒賊匪五百二名著官文等卽飭在事文武認

真攻勦迅復堅城並將附近縱陽一帶援賊分投埽蕩所有出力員弁著官文等查明保奏

同日和春奏言南岸防勦事宜臣等屢飭水陸各營晝夜嚴防竄越九月初七八等日烏江一帶有大幫賊船乘風下駛我軍迎頭兜勦轟沈逆船十餘隻奪獲九隻斃賊五六百名連日金陵賊匪因我兵四出多方肆擾均經守牆鎮將

督率兵勇合力擊回其鋒稍戢其石子岡一帶
濠壘計長一千數百丈現已晝夜趕築約須一
月可以歲工惟西路銅井慈湖等處逆擾愈集
愈多號稱數萬均由青陽池州而來揚言分道
內犯高淳溧水秣陵關等處以救金陵已飭總
兵虎嵩林等嚴密防維互相策應並咨鄧紹良
就近兼顧至鄭魁士督辦濱防前經胡興仁奏

令募勇二千馳援江北該鎮新勇業已募足俟
浙省解到軍裝卽行拔隊前來臣函囑其取道
高淳東壩察看賊情緩急設法圖維備該處警
報稍紓仍來金陵調遣以收指臂之助

和春又奏言八月二十二日蕪湖股匪傾巢直
撲魯港水營遊擊鄭吉星等開礮轟擊接仗未
久老鴉山白馬山兩處各出悍匪千餘蠭擁而

來會合石碗股匪抄襲馬步橋營卡都司馬喜
督帶划船輪流迎擊該逆從礮火叢中填濠直
進遊擊郭定猷連開大礮轟斃悍賊數名守備
梁正源等各率所部四面包抄賊衆大潰由蕪
湖竄逸同知林士志督帶廣勇橫抄截擊一路
賊屍枕藉直抵老鴉山始行收隊其劉家村高
埂鋪兩路之賊亦經參將李起高等擊退共計

斃賊七八百名生擒賊目傅均振等十八名
同日翁同書奏言粵逆由和州全椒巢縣合肥
等處窺擾仙蹤地方月餘以來殆無虛日經署
含山縣運漕巡檢徐模等督團堵勦屢獲勝仗
八月十九日大股賊匪猝至把總宇安邦等親
督練勇設伏圍攻斃賊數十名追至清水塘昭
關會圍擒獲賊目七名陣斬賊匪無數逆衆棄

械奔逃追襲二十餘里該巡檢徐模等齊團殺
賊保衛地方殊堪嘉尙擬飭查明出力員弁紳
董酌量存記彙案奏請獎勵均奏入報

二十四日丙申袁甲三奏言粵捻兩逆倡亂數載
自廬城復陷以來勝保奉

命南征雖極力兼籌已覺應接不暇不意江北大營自

浦口失事後節節退守揚儀一帶居民旣逃避
一空兵勇亦不戰而潰是江北大局已敗壞不
堪揚州而北並無一兵河臣漕臣雖於洪湖蔣
壩及淮安等處設防而限於經費兵勇無多不
足以扼險要萬一浦六儀揚之賊長驅而北何
以禦之况臨鳳撫匪本與粵逆呼吸一氣通計
江北粵撫兩逆不下數十萬人若互相牽引同

時突過清淮上下千餘里門戶洞開何恃不恐
臣軍自伊興額挫折後整頓非易豫兵在鹿邑
祇能顧及西面山東兵在曹單又相離較遠以
現在大局而論惟徐州歸德淮安三處屯紮重
兵可以橫截南北以固藩籬臣現旣駐紮宿州
則宿徐一路臣自當專任其事若歸德但恃東
豫防兵旣不相統轄卽未免各分畛域名爲自

固邊防其能固與否實未敢遽信至清淮一路
防兵更少地方之緊要事機之迫切又有倍於
西路者從前由歸德至清江尙有黃河以限南
比今則頭頭是道統計清淮歸德去臣等營均
在數百里外臣與勝保兩軍非惟無兵可撥實
亦鞭長莫及合無仰懇

聖恩迅簡大員各督重兵分駐清淮歸德兩路力遏要

衝與臣等互相援應庶北路有備無患臣亦無
旁顧之憂得以盡力進剿俟東路逆氛稍緩再
行分路並進與勝保諸軍四面兜擊以期一鼓

蕩平奏入

上諭曰汝思此時有何大員可派不過欲將東豫邊防
盡歸汝調遣必至各撫臣紛紛請旨朕總握大局實
不能爲爾等排解也

袁甲三又奏言現在賊勢浩大粵捻兩逆均有
北趨之勢北路地勢平曠該逆動以馬隊縱橫
馳突我軍專恃步隊萬難制其死命臣營馬隊
甚少各路軍營一律喫重既難抽撥其東三省
馬隊又萬不敢再請添調因徧詢各馬隊弁兵

據稱

盛京吉林黑龍江等處聞多獵戶平日練習馬上

槍箭專以打牲爲業膽氣素壯槍箭均無虛發
若招募隨征必能悉成勁旅可否請

旨飭下盛京黑龍江吉林各將軍選派曾經出征得力
大員就近招募一二千名酌照征兵給予行糧
責成嚴加約束帶領前來以資攻勦奏入

上命軍機大臣傳諭玉明景滄奕山曰盛京吉林黑龍
江等處向多獵戶平日練習馬上槍箭專以打牲爲

業其膽氣素壯若招募隨征必當可用著玉明景滄
奕山各就地方情形酌量察看該獵戶等如果技藝
嫺熟情願充當兵丁卽著擇其乘騎便捷槍箭有準
者招募若干作爲餘丁隨時訓練既可以備本地邊
防兼可以資他省調撥之用若此項人等專以打牲
爲業生計攸關不願應募遠行並著據實具奏勿庸
勉強

二十五日丁酉德興阿奏言張國樑督率諸軍馳

西

抵儀徵縣屬茅家橋地方該逆知我軍乘勢壓

下聞風喪膽自相驚懼東北兩門外賊衆全撤

八城張國樑飭令總兵李若珠由東門直入成

明富明阿等由北門直入張國樑親督各勇並

飭該縣民團隨同助剿該逆望見旗幟紛紛逃

竄各軍乘勝擁入殺斃逆匪數百名將儀徵縣

城收復張國樑統領各軍暨毛三元等剋日移
師西上步步爲營以期力解六合之圍惟天長
一縣悍賊悉聚其中西北山尙有賊蹤往來六
合大營後路關繫綦重且揚城僅有兵二千餘
名由鞠殿華統帶駐守亦形單薄刻下桐城鎮
時有賊匪數千直至三河南岸離蔣壩不過四
五里僅隔一水儻該逆紮筏過河直撲清淮則

高寶又在核心臣憂咨邵燦庚長設法堵禦如
該逆由湖東越則高郵首先喫緊邵伯後面尤
應嚴防臣派令副將馬國陞帶兵扼守高郵湖
口並撥水敵臺二座嚴飭兵勇堵截要隘協防
露筋等處臣思天長一日不克高寶清淮一日
不能安枕邵伯裏下河揚城各路斷難撤防卽
六合官兵亦有首尾相畏之勢惟有仰懇

飭下勝保翁同書迅速派撥重兵進取天長力遏北竄
而保裏下河完善之區奏入

上命軍機大臣傳諭德興阿張國樑鞠殿華成明毛三
元曰張國樑克復揚州後督率諸軍進復儀徵縣城
實屬奮勇可嘉現已移師西上步步爲營卽著乘勝
迅解六合之圍並將江浦浦口逆賊次第埽蕩俾浦
口仍得安營以扼守江北大局方能重整該逆此時

聞風竄遁必至復擾他處務須盡力合圍就近殲除
方爲妥善惟天長未克張國樑一軍勢難兼顧已命
勝保帶兵攻勦至天長得手其竄出賊匪恐由洪湖
擾及高郵一帶雖有邵燦庚長所派兵勇曾獲勝仗
但兵力尙單儻有大股賊匪竄至恐難抵禦德興阿
業已收集兵勇布置防守所有邵伯後路著卽督飭
帶兵各員實力嚴防務與邵燦庚長所派兵勇聲勢

聯絡以資保衛

上又命軍機大臣傳諭勝保曰張國樑等攻克儀徵現
圖力解六合城圍惟天長一縣悍賊虜聚其中勝保
昨在三河獲勝幸有蔣壩防兵夾擊不令竄至清淮
勝保自必遵旨進攻天長惟兵力尙單著通籌酌調
以期迅速奏功至克復後敗竄之賊如遁入洪澤湖
中則清淮以下必受其害邵燦庚長等所派兵勇雖

曾獲勝而爲數不多該大臣務當捲兵進剿勿令天長逆匪由湖東趨是爲至要

上諭內閣曰提督張國樑克復揚州後卽督率各軍馳抵儀徵縣屬茅家橋地方該逆聞風驚懼張國樑飭總兵李若珠等率領兵勇由東門北門直入並親督大隊繼進將儀徵縣城收復張國樑援剿江北所向克捷實屬奮勇可嘉著卽乘勝將六合等處賊匪一

律埽除迅速奏功待膺懋賞

同日慶端奏言我軍攻克建鄧各處城池以後該逆勢甚窮蹙餘股敗竄上洋臣當飭參將黃禮鉉等由房村嵐下大厯口等處進攻以杜該逆奔竄建陽之路參將惠壽等帶領兵勇由順昌下攻上洋以杜該逆奔竄邵武之路延建邵道潘駿章督勇在江汜以上一帶堵勦以杜該

逆奔竄沙縣之路並飭周天培陳維漢水陸分
路進攻洋口務期妖氛迅埽俾地方及早肅清
以仰慰

皇上眷顧南邦之意奏入報

聞

二十六日戊戌勝保奏言臣此次攻勦北犯逆匪
擒獲生賊多有金陵逃出者據供浦口各營撤

退後沿江北岸皆賊雖經江南官兵堵勦嚴密而賊之糧米火藥接濟已多並金陵逆首僞令將江北各賊及新脅之衆放入城中約有萬餘令其守城又將城內長髮之賊若干驅至江北歸各逆首統轄令向各路撲竄據稱浦營未潰之先金陵賊衆缺糧飢斃者填塞道路衆心業已潰散若無此變總在九十月間必能克復金

陵全數殄盡等語不意江北大局一旦決裂至此誠爲可惜臣連日督兵盱境力挫北竄賊鋒本擬節節埽蕩卽日直擣天長再分奇兵以援六邑不期有六合城中潰勇縋城逃出由小路前來抵營報信據稱縣城已於九月十八日寅刻失陷溫紹原不知下落臣反覆詰其情狀不覺憤懣填胸該道數載守城保全甚大此次嬰

城效命更爲人所難爲乃因德興阿浦日退軍
不保六合竟令忠臣良吏坐陷賊手而不一援
數萬生靈盡爲齧粉失律之罪實所難辭除由
臣探明六合實在情形外謹就所知所聞據實
具陳奏八

上命軍機大臣傳諭德興阿張國樑鞠殿華成明毛三
凡曰據勝保奏據六合潰勇傳說縣城失陷溫紹原

尙無下落等語覽奏實深憤邇張國樑於十七日收復儀徵即可力解六合之圍乃據勝保傳聞該縣於十八日寅刻失守其時大兵自尙未趕到候補道溫紹原守城數載保全甚大茲以力竭被陷著德興阿等卽查明該員如何下落並確查失守情形詳細具奏儀揚雖經克復而六合被陷與天長江浦之賊勢成聯絡於江北大局頗有關繫張國樑諒已督兵進

勦著卽乘賊蹤未定奮力攻擊迅拔堅城本日據胡
興仁奏周天培已赴延平副將朱承先等管帶兵勇
徑赴揚州副將陶茂森等所帶湖南兵勇亦日內可
到著德興阿等俟此項兵勇到揚卽行飭赴張國樑
軍營以厚兵力德興阿鞠殿華仍當嚴扼揚城及邵
伯要隘毋令賊蹤北竄

勝保又奏言賊匪趨撲蔣壩經臣勝保督軍於

三河集一帶擊敗其前股先已奔回天長老巢後股逆衆萬餘憚我馬步緊躡卽擁至馬家壩憑河恃險爲死守計臣因趕緊嚴密布置於盱眙前路之喬家橋穆店狀頭橋各要隘分軍屯紮飭令迅速合力進攻一面親率各軍前紮連日鏖戰屢有斬擒夜間時復派隊驚擾使之不能休息該逆抵死抗拒膽敢繞赴廸北之高橋

一帶縱火焚燒潛圖劫我營盤均經各營齊力擊退斃賊極多九月十八日臣親自督軍直抵馬壩賊壘各軍更番疊進該逆仍復擁衆迎拒卽經揮軍猛擊屢撲屢壓始行敗退我兵一齊進逼傷斃賊匪不計其數臣密派副將張得勝選帶勁旅乘夜潛往襲取另派營總莫爾賡額等策應張得勝卽於是夜率勇潛抵賊巢左近

先用火彈噴筒拋進壘內立時火起兵勇齊聲
呐喊該逆不料官兵黑夜突來蒼黃驚亂各軍
一擁而入奮力擊刺無不應聲倒地逆衆由小
巢竄向村前大壘各馬步一齊抄殺所向披靡
張得勝等復乘機策馬橫截左右衝突賊屍填
滿溝壑殺斃刺斃者不可數計馬壠一帶附近
大小賊壘一律肅清餘匪概向東南竄去當卽

派馬步各隊乘勝連夜追勦不容該逆喘息以
期直擣天長所有屢次出力員弁兵勇可否准
臣擇尤保奏出自

述格鴻施奏入

上諭內閣曰天長竄匪趨撲蔣壩經勝保督軍於三河
集擊敗該逆於高橋地方焚擾均經各營擊退斃賊
甚多勝保督兵直抵馬壩賊壘縱火焚燒逆衆倉猝

驚亂各軍乘勢擁入一齊抄殺遂衆大潰追殺無算
當將馬場大小賊壘一律肅清仍著勝保督飭各軍
迅將竄向東南賊匪追勦直搗天長克復城池出力
員弁兵勇准其擇尤保奏

勝保又奏言提督德安憂奉

諭旨令其援救六合臣察看該提督詞氣尙屬安詳心
地殊欠明白前此紮營大墅街因粵逆有蠢動

之意輒卽稱病回廬迨廬郡失陷退居定遠仍復託病不出自臣奉

命總制皖軍遂卽日銷假揆厥情事殆慮臣查出病勢虛實有干叅究九月初捻逆竄撲比鑪橋經翁同書商令帶兵進剿詎該提督行出三十里一聞鑪橋有失登時退回未免巧於避就臣與翁同書皆謂其難當大任卽如前由江南來皖時

所帶官兵沿途不能約束以致兵丁中道擅自
折回曾經和春悉其不善駕馭當此勦賊喫緊
之際畀以一旅之師或可勉強從事若令獨當
一面深恐貽誤軍情

聖主知人善任自有權衡但臣旣有確見不敢不據實
直陳奏入

上諭內閣曰湖北提督德安自廣西勦匪以來久歷戎

行擢至專閩大員乃前由江南赴皖沿途不能約束
兵丁以致中途折回曾經和春附叅今當攻勦喫緊
之時輒託病規避有意遷延實屬有負委任德安著
革去巴圖魯名號拔去花翎以示薄懲儻再不知振
作卽著勝保嚴叅懲辦

勝保又奏言粵逆大股屬集浦六天長一路臣
先期飭派已革總兵吉順統軍移進前路之蔣

家巷設法進攻迅籌規取其懷遠捻逆南撲之路總以定遠西北之黃宜鋪殷家澗爲要隘該處早經派兵扼紮臣現復飛飭遊擊唐玉輝等會合嚴密防範以便扼要兜剿遇有緩急兵力亦尙不單臣現在盱天一帶攻剿正在萬分喫緊斷難抽身遽去如果東路驟能得手而西路果有警信臣亦必兼道馳往若西路別無動靜

則天長毗連六合臣卽在此路調度策應亦不敢稍分畛域至前奉

諭旨令臣將江南派援六合之軍就近調度仰見

聖明倚賴先其所急今提督張國樑已由江南大營抽帶兵勇取道儀徵揚州進援六合臣趨赴天長必可與該提督浹洽於東南大局均有裨益奏

同日胡興仁奏言賊匪由華埠竄往德興旋於
七月二十七日直逼婺源參將余永椿等迎擊
獲勝該逆大股犯黃瓜尖嶺參將丁文尙等迎
戰已勝後股賊衆驟至兵力不支千總周占雄
等傷亡適同知蘇式敬等來援賊始退卻旋由
別路肆擾勢將逼城經署婺源縣知縣吳崧慶

率團迎擊賊遂由澆嶺退出婺境竄至景德鎮
方馳勦間德興另股悍賊遽於八月初六日突
竄海口進撲婺城吳崧慶等率團固守官軍後
隊未及趕到衆寡不敵遂致失陷張芾派參將
王夢麟等攻勦十數次屢有斬獲會總兵李定
太等陸續到婺策應知府林廷選復赴婺督團
助勦悍賊繼至者絡繹不絕官軍盡力合攻尙

未得手同時閩賊回擾廣饒竄踞景德鎮道員
劉于湧攻勦失利勢甚鴟張初十日由景德鎮竄
入祁境之倒湖經南鄉鄭姓團練擊走十二日
又經署知縣林用光率團併力堵勦賊竄平隴
林用光等三路進勦鏖戰三時之久陣斬僞將
軍蕭明奎生擒僞先鋒黃亮德僞司馬謝先潰
等五十餘人該逆由高低嶺全數退出張芾度

賊既不能逞志祁門必合景鎮浮梁青陽之賊乘虛轉窺石埭之崇覺寺黃土嶺兩防正在布置賊果兩路竄至石埭七都該處防兵止存二千人副將吳偉奇督率防堵實形單薄卽飛咨江長貴自漁亭赴石埭督勦調余永椿填紮漁亭飛飭參將張應超等各率隊伍馳援知縣楊裕仁集團越境助勦賊至甲子嶺我軍擊退二

十二日賊犯雍溪吳偉奇等迎擊賊卽敗走二
十四日進犯黃土嶺營盤經袁國祥擊卻都司
黃朝升陣斬僞指揮葉有手一名是日青陽另
股賊匪進犯崇覺寺營張應超等迎擊太平青
陽民團齊出助戰賊亦敗逃二十五日吳偉奇
擊賊陵陽鎮分流嶺銷封村等處斃賊甚多次
日賊又犯黃土嶺營勢甚兇猛賊攀都司閔步

璵營門率衆直上守備許培剛砍斃僞指揮葉
汝才一名乘勢掩擊賊始敗退而青陽之賊又
犯崇覺寺我軍在黃土嶺得勝回擊又得大勝
二十七日各路之賊又合攻黃土嶺營江長貴
率親軍掩至把總張天爵首先馳入手刃數賊
戰歿於陣旋因我軍奮力圍擊賊勢大敗越日
賊兩路同犯崇覺寺黃土嶺兩防官軍民團合

力擊散賊併力攻黃土嶺營江長貴率各隊從
左右山梁縱擊吳偉奇等合軍會戰主事楊摛
藻知縣楊裕仁各集團數千助勦賊遂潰走是
夜江長貴派隊各帶火器潛入賊營又派隊四
山埋伏同時縱火賊乃驚潰九月初一日又派
隊四出勦賊於霧露嶺魚龍洞陵陽鎮等處賊
經大創之後望風回竄青陽石埭現已肅清婺

源賊匪負嵎死拒幸總兵臣周天受自閩回徽
卽派都司陳大富等馳赴太平助江長貴以防
青陽之賊回竄派都司周光明等馳赴漁亭助
余永椿防祁門黟縣一帶派遊擊熊廷芳等馳
赴清華街助攻婺源周天受率親軍由上溪口
前進督飭各軍迅圖克復其應卹應獎應効之
員俟事竣彙案辦理奏入

上命軍機大臣傳諭胡興仁張芾曰此次竄賊先由華
埠窺伺婺源方經官軍擊退遽有另股從德興撲陷
縣城其竄踞景德鎮之賊分擾祁門不能逞志遂復
合青陽悍賊糾竄石埭曇犯崇覺寺黃土嶺等處賴
張芾先期布置江長貴策應迅速不至內犯祁門練
勇太平民團復能用命助勦俾祁石兩防得就肅清
惟婺源尙爲賊踞周天受現自閩回徽於青陽祁門

黔縣一帶均各添兵助防周天受亦已督率親軍由
上溪日前進著胡興仁張芾迅飭各軍克復婺城毋
令久踞並嚴防該匪回竄祁門石埭等處以期全境
均臻靜謐

胡興仁又奏言周天培一軍聞赴延平此時想
已在道尙未折回浙境副將朱承先管帶楚駿
固原兵勇一千五十餘名又遊擊韓廷貴等帶

鎮靜健勇四百餘名參將和順帶水勇三百名
均於九月十四日到杭臣卽檄令先赴揚州聽
候和春調遣其副將陶茂森所帶湖南兵七百
五十名仁勇四百五十名亦日內可到遵令馳
赴揚州並飛咨鄧紹良鄭魁士將甯防舊勇選
派二千名馳赴六合卽以新勇留於甯防臣前
接和春咨稱鄭魁士不可離甯一俟周天培到

杭仍令其帶隊前進奏入報

二十七日亥德興阿奏言臣接張國樑函暨成
明等稟稱帶領兵勇馳往陳板橋紮營次日卽
逼六合城下乃途中獲被擄難民陶元一名據
供六合縣城已於九月十八日黎明失陷又據
城內逃出勇士馬福升等供稱十八日天明比

門地雷聲發未曾打開各營仍然守牆忽小東
門又地雷聲響城牆轟開火光四起賊已進城
兵勇見賊多難禦由北門城角越城龜水而出
候補道溫紹原總兵羅玉斌知州李守誠存亡
未卜連日諜報天長又添賊黨該處各路可通
如由西北出竄則揚州可危比擾蕪湖則清淮
難守若由高寶湖而東越則邵伯裏下河必至

跋蹕甚爲可慮 臣挫衄之後憂咨勝保翁同書
請其分兵勦辦乃六合守及一月不遣一卒赴
援天長未經失陷之先旣無防兵失陷以後僅
有馬隊數百迄無重兵勦辦今賊勢猖獗異常
惟有仰懇

訪下勝保等統兵分駐天長迅圖克復以弭切近之患
又據張國樑函稱南岸溧水縣亦於十八日失

守擬酌留兵勇二三千名協守北岸餘卽親帶
南渡臣思張國樑重兵皆去江北各軍分扼儀
徵又恐該逆往來其間探知虛實從西北山抄
我後路且溧水旣失鎮江必當置防北岸瓜州
必得撥兵駐守臣咨請張國樑撥留精銳二三
千名派員管帶徑赴瓜州紮營以期南北聯絡
設揚州有警亦可就近援應總兵成明奉

旨幫辦軍務臣卽囑令管帶各隊來揚與鞠殿華裏外
扼堵毛三元卽於萬福橋六牖兩處往來防禦
臣督率海全等仍扼邵伯馬國陞防守高郵湖
口距天長僅六十里再德安尙未有起身信息
周天培援浙一軍亦未知行抵何處刻下各處
防不勝防兵力單薄願請

飭催迅速來揚其周天培之兵勿爲南岸截留江北防

勦乃爲有益一俟此項官兵到齊再行拔營前
進奏八

上命軍機大臣傳諭德興阿鞠殿華成明毛三元曰昨
據勝保奏六合潰勇傳說縣城失陷曾諭德興阿等
確查情形具奏本日該大臣奏六合不守兵民所供
略同並有溧水復陷張國樑已渡江南去各情覽奏
更深憤懣六合孤城困守日久德興阿等潰師不振

節節退守未曾撥兵救援及至張國樑趕到勢已無
及今張國樑旣因南岸緊急馳回應援並酌留兵勇
二三千名協守北岸總兵成明旣隨同張國樑往援
六合卽當督同兵勇會合張國樑留下之兵進攻六
合何以德興阿轉令帶隊回揚勝保因天長被賊竄
踞親赴盱眙扼截曾於三河集等處勦敗蔣壩竄匪
昨已飭令迅擣天長以顧北路並據奏已派德安帶

兵援勦六合德興阿等挫敗後株守邵伯今復調回
成明又欲將張國樑所留兵二三千名防守瓜州置
六合於不問實屬一籌莫展昨據胡興仁奏周天培
遠在延平未能卽到已派朱承先等帶兵到杭卽日
前赴揚州其陶茂森等所帶兵勇亦日內可到此項
兵勇本諭德興阿飭赴張國樑軍營今該提督回至
江南所有朱承先等兵勇到揚著德興阿等仍令成

明帶往六合與張國樑所留兵勇會合將六合逆匪
迅速剿除以圖克復稍贖前愆如揚州兵力尙單可
將成明前次帶往之兵酌留一半交德興阿布置毛
三元現在萬福橋六蟠兩處往來防禦即可責令叅
顧瓜州若瓜場等處再有疏虞恐德興阿等不能當
此重咎也

上又命軍機大臣傳諭和春張國樑許乃釗曰六合縣

城已被地雷轟陷漂水縣城亦於是日失守張國樑
援勦江北連克儀揚滿擬迅解六合之圍而該城於
大兵未到之先業經被陷該提督因漂水失守折回
南岸自係先其所急漂水逼近高淳東壩及鎮江一
帶處處可虞和春張國樑務當體察賊情妥爲布置
此時江南江北賊勢鴟張情形俱屬喫緊張國樑留
兵二三千名協防北岸尙恐不敷攻勦胡興仁前奏

副將朱承先陶茂森等管帶兵勇曾諭德興阿飭赴
張國樑軍營現在該提督已赴江南此項兵勇仍令
馳赴揚州由德興阿派員管帶與張國樑留下之兵
同攻六合毋庸截留

二十九日辛丑楊能格奏言儀徵克復後六合縣
城被賊攻陷溧水縣城亦報失守提臣張國樑
大隊卽日渡江江北各軍所餘幾

分布寥寥況屢潰之餘士無固志聞賊先驚揚
州西北甘泉山一帶地接天長賊蹤偏野窺伺
百端數十里坦途朝發夕至勢極危險若果賊
衆復來安能望其固守而德興阿自屢退之後
恇怯不能自振偃仰僧寮幾於一籌莫展不思
天長一路賊如分股包抄卽邵伯亦難苟安清
淮隨卽震動北路門戶何所恃以無恐臣目擊

情形不敢不據實直陳伏維

皇上宸謨廣運燭照幾先大局幸甚奏入

上命軍機大臣傳諭德興阿鞠殿華成明毛三元曰昨
諭德興阿仍飭成明會合張國樑所留兵勇進攻六
台原因儀揚甫經收復必須前路有兵截勦庶可杜
其紛竄若但知遠避邵伯一籌莫展不知振作則賊
勢方張何處不可竄越現在鞠殿華駐守揚州成明

帶兵會同張國樑留下之兵進攻前路使

向東竄則儀揚可保加以浙江撥回朱承先等所帶
兵勇如果振刷精神申明紀律未嘗不可轉敗爲功
儻仍毫無布置則六合大股賊匪必至仍擾儀揚德
興阿等自問當得何罪至天長一路雖有勝保督兵
進剿西北甘泉山一帶地接天長亦應嚴防竄匪鞠
殿華成明毛三元均係幫辦大員亦應力圖振作儻

布置未周再有疏失朕惟有執法從事將德興阿等重治其罪懷之慎之

上又命軍機大臣傳諭勝保曰昨據德興阿等奏溧水失守張國樑已帶兵渡江僅留兵二三千名協守北岸已諭德興阿等仍令成明帶兵會同張國樑留下之兵進攻六合惟德興阿自遭挫敗不能振作雖經機兵分扼各隘而潰敗之兵恐不足恃現在揚州後

路如清淮高寶均屬空虛儻天長賊匪由湖東趨必至蹂躪腹地雖有邵燦庚長派防兵勇亦恐力難堵遏勝保旣攻克天長務須驅賊仍歸來路勿令由湖竄擾高寶清淮等處方可維持北岸大局著勝保妥籌兼顧並將攻勦情形迅速馳奏以慰廑念

楊能格又奏言揚城之東南北長河一道計寬一百二十餘丈上建萬福橋爲八裏下河必由

三
之
路咸豐三年前大臣琦善恐賊東竄將橋拆去並於東岸駐紮勇營扼險據守是以數年以來裏下河一帶賴以保全昨因張國樑統兵前來搭造船橋渡兵西進現在德興阿留爲兵勇退路未便卽行拆卸臣查勘有橋則河失其險儻賊匪乘間豕突必至猝不及防當將雇募之甯波綠皮艇五隻安設礮位選派練勇移泊該

處以助守禦奏八報

同日和春奏言湖北宜昌鎮總兵虎嵩林奉派
駐守溧城該處近接小丹陽博望等處當逆衆
聲言內犯屢經嚴飭該鎮加意防維如能堅守
待援何至逆氛闖入乃遇賊卽潰以致失陷城
池實屬大誤事機迄今四日之久始據稟稱退

至溧陽縣城殊出情理之外似此恇怯無能自應嚴行叅辦惟念其子虎坤元戰功屢著臨陣捐軀尙可稍從末減相應請

諭將總兵虎嵩林卽行革職永不敍用以爲臨敵退縮者戒奏入得

虎嵩林著革職永不敍用

和春又奏言據虎嵩林稟報小丹陽之賊大股

賊至紅藍埠參將馬騰超失利該逆旋撲縣城
適鄭魁士派副將蔣錫光帶勇到溧水合力擊
回無如賊悍兵單臣派總兵張玉良管帶馬步
三千星馳援應乃該逆已於九月十八日酉刻
分股抄擗虎嵩林等衆寡不敵竟被關入縣城
四面紮營聲言分竄溧水北至金壇東南至溧
陽均不及百里與高淳東壩相爲脣齒又係大

營後路藩籬當於無可抽調中添撥兵勇二千
由張玉良統帶趁該逆立腳未定直擣其巢迅
圖克復並檄鄭魁士由高湧倍道前進兩路夾
攻以期得手惟是臣營馬步將領兵勇屢經派
赴江北福建實已單薄張國樑酌留兵勇卽於
二十二日督同總兵李若珠先後帶隊回營臣
等面商現在溧水一城甫經賊踞必須趁其守

具未備一鼓驅除方免滋擾因添派總兵馮子
材帶兵三千會同張玉良由湖墅進兵迅圖攻
復仍派總兵戴文英帶兵三千駐守秣陵關以
顧大營後路此時西南各路營盤最爲喫重均
由張國樑督率李若珠等相機堵禦以壯聲威
奏入報

三十日

壬寅

曾國藩奏言

臣行抵雙港節據探報

閩賊大股三萬餘人回竄新城道員劉長佑扼守隘口連日苦戰雖屢獲勝仗而該逆愈來愈多更番猛撲又吉安城中八月初十日夜乘大籜衝出追殺未盡之賊尙餘數百人沿途裹脅復聚至千餘人連陷崇仁宜黃兩縣撫建各屬處處戒嚴臣以撫建兩城收復未久民心易於

動搖劉長佑一軍兵力本不甚厚其分防瀘溪各營曾於八月失利堵禦閩賊大股已慮難以支持復聞崇宣之警尤恐軍心不固民間喧傳石逆全股希圖回竄南城等縣飛書請援張運蘭亦稟請先救新城遂令張運蘭率所部兼程馳進臣亦改道南行回顧建昌途次接奉八月

十四日

諭旨知石逆窺伺撫建之說早已上達

宸聽

聖天子明見萬里無微不照臣督隊趨行馳抵金谿聞

臣

劉長佑大獲勝仗自八月十五至九月初五等

日竭力痛勦殲擒之賊不下二萬人餘匪仍由

建甯一帶竄去接見各團紳民無不稱爲奇捷

現在建昌肅清崇仁宜黃之賊亦由南豐竄入

閩境臣抵建昌後擬將撫建甯都各府州防勦事宜咨商江西撫臣妥爲布置卽率師由杉關入閩至劉長祐堵剿義賊情形應由督齡奏報奏入報